

# INUIT ATAQATIGIIT

## Inatsisartuni



UPA 19/172  
25. april 2019  
Sofia Geisler

**Nunatsinni plastikkinik atuinerup annikillisarnissaa anguniarlugu Naalakkersuisut kingusinnerpaamik UPA2020-mi suliniutissanik iliuusissatut pilersaarusiamik saqqummissinissaannut peqquneqarnissannik Inatsisartut aalajangiiffigisassaattut siunnersuut. Suliniutissatut pilersaarutit anguniagassartai tigussaasuussapput iliuusissanillu ilaqartinneqassallutik. Pingaarnertut suliniutissatut anguniagassat EU-mi plastikkinik atuinerup annikillisaaviginissaanut pimoorussamik suliniutaannut appasinnerussanngillat.**

(Inatsisartunut ilaasortaq Mimi Karlsen, Inuit Ataqatigiit)

Aarhusip Universititiat issittumi ilisimatusarnermut immikkoortuata Californiami 2018-imi saqqummiinerani ilaatigut atuarneqarsinnaavoq Nunatta Kitaani 2000-miit 2016-imut timmissat Malamuit katersorneqartut qanoq annertutigisumik plastikimik nerisaqarsimatiginersut. Timmissat 2016-imi misissorneqartut 31 % -it 39 %-illu akornanniittut aqajaruini nassaarineqartut 0.1 gramimit annertunerupput, plastikkillu taakku sananeqaataasa paasinarsisippat timmissat aqajarormiui tasaanerusut plastiskit imartani sarfamik siaruarsimasut.

Misissuinermi tassani aamma takuneqarsinnaavoq Kitaani sissani nassaarineqarsinnaasuni plastikkit ingitat 80 procentii tassaasut nunatsinni namminerme najugaqartut ingitaat.

Tassami Kitaani Baffinip Kangerliuarmanga Davis Strædelu immap sarfaanik Atlantikup Avannaaneersumik annikitsuinnarmik sunnerneqartarmata plastikit ingitat tamaaniittut uatsinnit ingitaanissaat periarfissatut qaninnerpaatut ilisimatuunit tikkuarneqarpoq.

Kitaani uumasut Malamuit misissuiffigineqarsimanerat assersuutissaavoq ernumassutissaqarnitsinnut qanoq sukkatigisumik plastikkit inuussutissanut siaruariartornerannut. Nunat avatitsinniittut mingutsitsinermik millisaaqataanissartik eqqumaffigiartuinnarpaat, uagullu nunatsinni aamma pisussaaffeqarpugut plastikkinik nioqqutissianik atuinitsinnut millisaaqataanissamut mingutsitsinaveersaaqataanissatsinnullu.

Assersuutitut atortigit Nunatsinni anartarfiit igittakkat maanna 5.240-uusutut §37 naapertorlugu taamani Inatsisartunut ilaasortaasup Jess Svanep februarip aallartisimalernerani apeqqaatanut Naalakkersuisut akissuteqarmata.

Ulluinnarni plastikkit assigiinngitsut atortakkatta saniatigut anartarfiit ingittakkat ikittuunngitsut plastikkinik issusunuk puullit pinngortitamut inginneqartarput, taakkulu ilaat immamik anguneqarlutik sarfaatsitillutik siaruartut qanoq amerlatigisut ilisimagunangilarput.

Aamma suli ilisimangilarput tamakku plastikkit issusuut imaasiinnarlugit arrortinneqarsinnaangitsut imaaneersunut nerisatsinnut qanoq sunniuteqarnersut.

Inoqarfiit qasseerpassuit eqqaavii matuugaangillat, taamaattumillu plastikkit tamaaniittut anorimit tinginneqarlutik imaaniilersut uumasunut inuussutigisartakkatsinnut qanoq sunniuteqarnersut uppersaatissaqartinngikkaluarlugit eqqarsarnangitsuunngilaq qanoq uumasut nerisaqatigiinnerat sunniuteqartarnersut.

Taamaattumik siunnersuuteqartup tunngavilersuutigisai aallaavigalugit aporfissalersorujussuannikkaluarluni piaartumik iliuuserineqarsinnaasunik pilersaarusiornissamik sulineq allartissasoq kaammattuutigivarput, Mimi Karlsenillu aalajangiiffigisasatut siunnersuutaa ataatsimiititaliamut attuumassuteqartumut ingerlateqqinneqarnissaa ugguaakkut innersuussutigalugu.